

# 't Herenhoentien





## **BESTE KIENDER!**

Et is al weer een hiel posien leden,  
dat jim 't *Herenhoentien* van oons kregen.

Mar hi'j is d'r now dan eindelijk weer! Mit vanzels  
weer een spannend aeventuur van Piepmoes en zien mao-  
ten en vanzels Klaos de kaeter en Miep, et vrundinnegien van Klaos.

Wat kan die Klaos toch ok een verschrikkelik vervelend monster van een katte wezen en Miep is hie-  
lemaole niks beter! Laot jim et verhael mar gauw veurlezen en vertel dan mar es wat as jim d'r van  
vienen! Of hebben jim misschien ok wel es een betien medelieden mit Klaos en Miep??

Mar d'r is vanzels meer te vienen in dit Herenhoentien. Op disse bladziede zien jim onderan een  
spullegien. In beide vakkies staon een hieleboel letters. Ze zitten d'r de hielten dubbel in. Dat bete-  
kent dat in beide vakkies een letter zit die ok in et aandere te vienen is. Mar d'r bin ok vuuf letters  
die mar in ien van de beide hokkies te vienen binnen. Welke vufe bin dat? Trek om die vuuf een cir-  
keltien henne en laot dan mar es zien as et goed is! En achterop? Now, dri'j et kraantien mar es  
omme, dan ziej' mitien was as daor te vienen is. Et inlegvel is dit keer een mooie kleurplaete. Veul  
plezier daormit én mit 't Herenhoentien en tot de volgende keer!



't Herenhoentien is veural bedoeld veur groep 1, 2, 3 en 4 van et basisonderwies in de Stellingwarven en verschient vier keer in et jaor. Et wodt bedocht, saemensteld en klaormaekt deur Sietske Bloemhoff en Gery Scholten, in opdracht van de Intergemientelike Begeleidingsgroep Hiemkunde in Oost- en West-Stellingwarf.

## **PIEPMOES, DE MOLLE EN ET VOEGELEI**

*(Een veurleesverhael van Sietske Bloemhoff)*

Et is op een morgen in meie, en prachtig weer. Piepmoes zit veur zien kesteel in et zunnegien an een bakkien thee. Hi'j het d'r een haezelneutekoekien bi'j en knabbelt daor now en dan een hoekien of. 'Wat een butengewoon mooie dag,' mompelt de moes. 'Daenk mar niet dat ik vandaege drok an et wark gao. Ik laot de boel de boel en gao mooi de bos in, misschien da'k wel even naor de Lende toe sjouw. Wat daenken jim, kiender, he'k geliek of niet? Misschien dat mien buurman, de molle, wel mit wil. Die zal et nocht ok wel dikke of hebben van die lange, koolde winter onder de grond.'

De moes et gauw zien koekien op en slobbert de laeste slok thee d'r aachteran. Hi'j het haost, et kriebelt him, hi'j wil vot!

Now, de molle wil wel mit. Graeg zelfs, want hi'j zat him aenlik wat te vervelen.

'Zullen we oonze zwembroek ok mitnemen, Piepmoes?' vragt de molle. 'Et waeter van de Lende is misschien wel waarm genoeg om even een baentien in te zwemmen.'

'Doen we,' besluit Piepmoes. 'Kom op, molle, dan gaon we!'

Opgetogen gaon de beide buren op pad. Now en dan kommen ze een peer van heur kammeraoden integen. Mar ze hebben et allegere lieke drok. Wat wil ie ok, et is ommes meie. Dan leggen haost alle voegels eier en de meeste ere dieren kriegen jonkies. Kiek mar, daor huppelt een knien mit een stok of vuuf jongen aachter him an deur de bos. De knien het et d'r mar knap drok mit om ze bi'j mekere te holen, want ze vliegen soms allegere een aandere kaant op. Even veerderop lopt een ree mit twie kleinties wat an een peer gröspollegies omme te pluzen. De kleinen speulen intied en maeken now en dan de malste sprongen.

Et roodbossien zit mooi te bruden op zien nussien. Hi'j lat Piepmoes en de molle zien eigies even zien. Mit een peer daegen zullen de kleine voegelties wel uut heur eigies kommen, daenkt et roodbossien. Ok de gelegouw is nog an et bruden.

'Kom mit een peer daegen mar weer, jonges,' ropt hi'j. 'Ik daenk dat ze d'r dan wel binnen. En bin ze dommiet groot, dan gao 'k gauw weer een keer mit jim op stap. Dat is al zoe'n poze leden.'

As Piepmoes en de molle bi'j de beukelaene binnen, niet zo veer van de Lende, zien ze de doeve.

'Heb ie gien eier, doeve?' vragt Piepmoes. 'Haost alle dieren bin drok in de weer mit jonkies en eigies. Of slao ie misschien een jaortien over?'

'Nee heur, Piepmoes,' lacht de doeve. 'Ik heb mien jongen al aorig groot. Ik maek vaeks niet zoe'n boel drokte van et nust, dat daorom bin 'k de eren meerstal een slag veur. En dat komt now goed uut mit dit mooie weer.'

'Hej' dan misschien ok nocht om mit oons mit te gaon naor de Lende?' vragt de molle.

'Wel nocht,' antwoordt de doeve, 'mar gien tied. Want de jongen bin dan al wel aorig groot, ze zit ten nog vol kattedwaod, dat ik moet now en dan wel kieken wat veur streken ze uuthaelen. Trouwens, now ik et toch over kattedwaod heb, jim moe'n wel goed uitkieken, want Klaos en Miep strunen ok in de bos omme. En ze hebben de ogen aorig wild in de kop staon, he'k wel zien!'

De beide dieren beloven veurzichtig te wezen en gaon weer veerder. Ze schieten mooi op. Die gindse bocht nog en dan bin ze bi'j de Lende. Mar wat zien ze daor aachter een peer struken bi'j die bocht? Daor beweegt wat... En even veerderop ok... Eerst beweegt d'r wat aachter de iene struke en dan weer aachter de aandere. En ze heuren now ok een mierkend en dan weer mauwkend gelach. Mierkend en mauwkend... Dat dudet op... Juust! Katten! Jim hebben et al in de gaten.

Klaos en Miep zitten aachter de struken. En ze schienen een protte wille te hebben. Mar waormit? Piepmoes en de molle sloepen hiel veurzichtig een betien dichterbi'j. Hiel, hiel veurzichtig. Da's vanzels slim verstanig, mar et is dit keer aenlik iens niet neudig. De katten zien alliend mar...

'Moej' now toch kieken,' piept Piepmoes tegen de molle. 'Moej' toch kieken wat ze now weer an et doen binnen, wat toch een misselike, aekelike poedzakken!'




‘Waacht even,’ fluustert de molle, ‘ik zie ja niet zo best... Verhip, now zie ik et ok. Wel verdorie,...’  
‘Stil, je,’ waarschouwt Piepmoes, ‘eers heuren ze oons ok nog.’  
Mar de katten heuren niks. Die hebben et vusen te drok mit voetballen, want daar bin ze mit an de gang. Mar ze voetballen niet mit een voetballe, mar mit een voegeleigien!  
‘Mooi spullegien, niet Miep,’ raost Klaos et uut. ‘Pas op, zo mitien maek ik weer een doelpunt! Dan stao ik veur mit vuuf-drieje!’  
‘Reken daar mar niet op, bliksemse kaeter,’ brult Miep en geft een beste trap tegen et eigen. Et ei vligt mit een grote boge weer in de richting van Klaos zien goal.  
‘Naost,’ giert Klaos et now uut van et lachen. ‘Now ikke weer!’  
En, hup, daar gaot et ei weer. Mar Klaos schöt dit keer ok naost.  
‘Ik krieg staorigan wel honger van al dat gevoetbal, Klaos,’ zegt Miep. ‘Ik zol zuver wel zin hebben an een lekkere, sappige, vette moes.’  
‘En anders ikke wel,’ bromt Klaos. ‘Mar we kun om te beginnen eerst dit eigien wel es opeten.’  
Op slag heuren Piepmoes en de molle een geweldig gekries in een boom vlakbi’j. Ze kieken naor boven en zien twee voegels allemachtig tekeer gaon. Ze bin doodsbenuwd en kwaod toegelieke.  
‘Oons eigien, oons eigien,’ raozen ze allebeide. ‘Die katten hebben oons eigien! Help, hellup!’  
‘We moe’n helpen, Piepmoes,’ mient de molle. ‘Dit komt niet goed. Et eigien gaot d’r zo an!’  
‘Ie hebben geliek,’ fluustert Piepmoes, ‘we moe’n de voegels helpen. We moe’n perberen ze hier bi’j oons te kriegen. Ik heb een plannegien.’  
Deur hiel zachies te roepen en stienties omhogens in de boom te gooien, kriegen de voegels in de gaten dat d’r hulpe is. Ze kommen gauw naor beneden en luusteren naor Piepmoes zien plan.  
‘Begrepen,’ zegt de iene voegel.  
‘Dudelik,’ nikt de ere voegel.  
Dan gaon ze de kaant van de katten op. Ien voegel vligt van de iene boom naor de aandere; hi’j is haost niet te zien. De ere maekt een bonke lewaai en klapwiekt mit de vleugels. Now en dan hipt hi’j een aentien omhogens. Et liekt krek as kan hi’j niet goed vliegen. En dat daenken de katten ok.  
‘Moej’ kieken, Klaos,’ mierkt Miep. ‘Daor komt oons happien van vandaege an stappen. Een lekkere, mollige voegel. Tsjonge, wat een gelok. Misschien zo lekker niet as een moes, mar veuruit!’  
‘D’r op of, Miep,’ jankt Klaos, ‘ie hebben geliek, mar we pakken wat we pakken kunnen!’  
Daor stoeven de katten uut aende om de voegel te griepen. Mar as ze zowat an him toe binnen, vligt hi’j gauw omhogens een boom in. Mitien begint een aentien veerderop de aandere voegel te sjilpen en te kreupelen. Klaos en Miep kieken mekeer an en spatten weer uut aende. As ze vlakbi’j de voegel binnen, begint et spullegien opni’j. Ok disse voegel vligt hadde omhogens een boom in en mitien heukelt even veerderop de eerste voegel weer. Dat gaot zo een hiele poze deur. De katten hebben niet in de gaten dat ze zo de hieltied veerder van et eigien of raeken. En dat is vanzels krek de bedoeling. As Piepmoes en de molle de katten niet meer zien, kommen ze gauw veur et locht en pakken et eigien. Ze kieken omhogens en zien een boom waar een nust in zit. Daor is et ei vast uutvalen.  
Ze waachten onder de boom tot de voegels weeromme kommen. Wat bin die bliede as ze Piepmoes en de molle mit et eigien zien. Ze bekieken et ei van alle kaanten en zien dat et gelukkig nog hiel is. De iene voegel pakt et veurzichtig tussen de poties en vligt d’r gauw mit naor et nussien.  
‘Wat hadden de katten de smoor in doe ze d’r eindelijk aachter kwammen dat we ze veur et lappien hullen,’ vertelt de ere voegel. ‘Woest weren ze en ze kregen nog ruzie ok. Ze gavven et mekaander op de schuld dat ze zo onneuzel west hadde,’ gaot hi’j veerder. ‘En mar foeteren dat ze now al weer alliend mar kattebrokkies kriegen zollen, vandaege. Mar ik gao now ok naor et nust toe, heur,’ zegt hi’j. ‘Kieken as et eigien lekker waarm en goed te plak ligt.’ En vot is hi’j.  
En Piepmoes en de molle? Die gaon best tevreden over heurzels veerder op weg naor de Lende en gaon vast wel evenpies zwemmen. Mar daar heuren jim een volgende keer wel weer over!

# VLAGGENVLAGGENVLAGGENVLAGGENVLAGGENVLAGGEN

Jim zien hieronder drie vlaggen staon. De linker vlagge is van de gemiente West-Stellingwarf, de middelste is van de perveensie Friesland en de rechter vlagge is van de gemiente Oost-Stellingwarf. De beide Stellingwarver vlaggen bin rood mit wit; de Friese vlagge het d'r ok nog blauw bi'j. Blauw bin daor de baenen die overdwas lopen. Op de kleurplaete ziej' Piepmoes. Hi'j het beide hanen vol mit vlaggen! Die vlaggen kommen uut allegere verschillende lanen. In de vlaggen staon ciefers. Elk ciefer staot veur een bepaolde kleur. Aj' die vlaggen neffens die kleuren inkleuren, ziej' percies hoe ze d'r in et echt uutzien. De ciefers mit de bi'jheurende kleur kuj' op de kleurplaete zels vienen.



de vlagge van West-Stellingwarf



de vlagge van Friesland



de vlagge van Oost-Stellingwarf

# VLAGGENVLAGGENVLAGGENVLAGGENVLAGGENVLAGGEN

\*\*\*\*\*

Hoe moet

Piepmoes

lopen

om bi'j

zien


kesteel

te kommen?

Geef et  
goeie pad  
an  
mit een  
zwatte stift







Op disse kleurpleete het Piepmoes allegere verschillende vlaggen in de haand. In die vlaggen staon ciefers. Elk ciefers staet veur een bepaalde kleur. Bij de vlaggen neffens die kleuren inkleuren, wees, porces, hoe re d'r in et eelt de witsien!

- 0 wit
- 1. rood
- 2. geel
- 3. donkerblauw
- 4. lichtblauw
- 5. groen
- 6. oranje
- 7. zwart